

20/06/1998

Kunjungi pelajar di luar negara

Noor Azlina Zainudin; Johnny Giles Senin

KEMENTERIAN Pendidikan disaran supaya sentiasa menghantar pegawai di semua peringkat bagi menemui pelajar yang menuntut di luar negara untuk mengetahui masalah yang mereka dihadapi.

Usaha ini perlu berikutan kebanyakan pelajar kita sentiasa kekurangan maklumat dan fenomena ini menyebabkan media asing mudah mempengaruhi pemikiran mereka mengenai negara sendiri.

Presiden Majlis Belia Malaysia, Datuk Suhaimi Ibrahim, berkata sesi pertemuan dengan pelajar boleh dimulakan dengan mengadakan program orientasi membabitkan persediaan mental dan fizikal sebelum mereka melanjutkan pelajaran ke luar negara.

Katanya, cara ini sedikit sebanyak dapat menanamkan semangat patriotik dan menyedarkan mereka tanggungjawab yang sedang dipikul untuk membawa pulang ilmu pengetahuan yang diperolehi untuk dimanipulasikan di sini.

"Selama ini kita terlalu mengharapkan Jabatan Penuntut Malaysia (JPM) untuk menemui pelajar yang bermasalah sedangkan jarak antara mereka terlalu jauh."

"Senario ini menyebabkan ada pelajar yang gagal ditemui dan mereka ketinggalan mendapatkan sebarang maklumat terkini mengenai apa yang terjadi di tanah air," katanya.

Beliau berkata demikian ketika diminta mengulas ucapan dasar Presiden Umno, Datuk Seri Dr Mahathir Mohamad yang menyentuh mengenai segelintir pelajar yang tidak mahu bekerja di negara ini setelah menamatkan pengajian.

Perdana Menteri berkata demikian sewaktu menyampaikan ucapan dasar di Perhimpunan Agung Umno, di ibu negara, semalam.

Di dalam ucapannya, Perdana Menteri menegur sikap sesetengah pelajar yang enggan berkhidmat di negara sendiri setelah mendapati mereka boleh memperoleh pendapatan yang lebih besar di sana.

Menurut Suhaimi, pelajar mempunyai hak untuk membuat keputusan menetap dan bekerja di luar negara selagi mereka tidak terikat dengan biasiswa atau pinjaman mana-mana badan kerajaan.

"Kita tidak mempunyai kuasa untuk memanggil pelajar balik secara paksa dan mengarahkan mereka berkhidmat dalam sektor swasta atau awam."

"Apa yang kita boleh buat hanya menghantar surat meminta mereka yang membuat pinjaman untuk melanjutkan pelajaran, agar membayar kembali jumlah yang telah digunakan."

"Secara tidak langsung, wang tersebut boleh digunakan untuk membiayai pelajar lain yang tidak berkemampuan untuk melanjutkan pelajaran ke luar negara sedangkan mereka mempunyai kelayakan," katanya.

Menurutnya lagi, bagi pemegang biasiswa, khidmat dan pengetahuan mereka masih diperlukan untuk pembangunan negara.

(END)